

**Sumáriu Kazu****Tribunál Distritál Suai****Abril 2019**

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Suai**1. Totál kazu ne'ebé JSMP monitoriza : 11**

Artigu	Tipu Kazu	Númeru
Artigu 145 Kódigu Penál (KP), konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	4
Artigu 139 KP konjuga artigu 2, 3, 35(b) no 36 LKVD	Krime omisídiu agravadu ho natureza violénsia doméstika	1
Artigu 178 KP	Krime aktu seksuál ho adolexente	1
Artigu 145 KP	Ofensa ba integridade fízika simples	2
Artigu 177 KP	Abuzu seksuál ba menór	1
Artigu 172 KP	Violasaun seksuál	1
Artigu 316 & 207 KP	Kontra bandu ho kondusaun sem karta	1
Totál		11

2. Totál desizaun ne'ebé JSMP monitoriza : 4

Tipu Pena	Númeru
Pena prizaun (Artigu 66 KP)	2
Suspensaun ba prizaun nia ezekusaun - Artigu 68 KP	1
Absolve	1
Totál	4

3. Total kazu sira ne'ebé adia tuir JSMP monitorizasaun : 0

4. Total kazu sira ne'ebé sei kontinua tuir JSMP nia monitorizasaun: 7

B. Deskrisaun sumáriu ba desizaun kazu sira ne'ebé JSMP monitoriza:

1. Krime omisídiu agravadu ho natureza violénsia doméstika

Nú. Prosesu : 004/18.AN.HTB
Kompozisaun Tribunál : Koletivu
Juis : Dr. Argentino Luisa Nunes, Dr. Benjamin Barros no Dr. Samuel da Costa Pacheco
Prokuradór : Dr. Jose Elo
Defeza : Dr. Francisco Caetano Martins
Desizaun : Pena prizaun tinan 18

Iha 01 Abril 2019, Tribunál Distritál Suai prezide julgamentu leitura akordaun ba omisídiu agravadu ho natureza violénsia doméstika ne'ebé envolve arguidu GG hasoru nia feen, iha Distritu Ainaro.

Akuzasaun Prokuradór

Prokuradór akuza katak iha 06 Maiu 2018, arguidu ho lezada husi Dili ba Distritu Ainaro ho objetivu atu tau naran iha igreja ba kazamentu nian. Iha 08 Maiu 2018, oras tuku 08:00 dadeer, arguidu no lezada ba iha igreja maibé to'o iha ne'ebá lezada lakohi atu tau naran ba kazamentu nune'e sira fila fali ba uma. Iha loron hanesan, oras tuku 23:00 kalan, lezada iha kama leten no telefone ba nia bin ho tanis no hateten katak nia lakohi tau naran ba kazamentu. Hafoin telefone hotu, lezada kontinua tanis, nune'e arguidu ho liman loos buti lezada nia kakorok no liman karuk hanehan iha lezada nia reen-toos maizumenus kuaze minutu hitu nia laran no rezulta lezada hakotu-iis (mate).

Prokuradór akuza arguidu kontra artigu 139 KP kona-ba omisídiu agravadu ho moldura penál husi tinan 12 to'o 25 prizaun konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarasaun katak nia laiha intensaun atu oho lezada. Arguidu rekoñese katak nia buti lezada nia kakorok no obriga lezada nonook maibé ho intensaun atu hapara lezada tanba tanis iha kalan bo'ot. Liu tiha minutu balun, arguidu mós husik nia liman husi lezada nia kakorok no book lezada nia ulun maibé lezada la book-an. Arguidu koko besik ba lezada nia inus hodi sente lezada nia-iis maibé lezada nia-iis laiha ona. Arguidu hakfodak no telefone kedas ba lezada nia bin no deklarasaun katak lezada mate tiha ona.

Testemuña FdG nu'udar arguidu nia subriña depoimenta katak maizumenus iha oras tuku 00:00 kalan, arguidu nia tiun (IT) ba iha nia uma no informa katak lezada mate ona no haruka testemuña atu ba fó haris lezada nia mate isin. Testemuña husu ba IT kona-ba motivu lezada mate ne'e no IT hatan katak arguidu fó hatene ba nia katak lezada mate tanba moras bibi maten. Bainhira to'o iha mate uma, testemuña haree lezada toba hela iha kama leten no arguidu tuur iha lezada nia sorin no iha momentu testemuña fó haris lezada, testemuña haree iha sinál metan iha lezada nia kakorok. Hafoin fó haris hotu testemuña fila kedan ba uma no iha dadersan testemuña foin rona katak polísia ka'er ona arguidu tanba deskonfia arguidu mak oho lezada.

Testemuña IT nu'udar arguidu nia tiun depoimenta katak iha 08 Maiu 2018, oras tuku 23:00 kalan, nia simu telefone hosi arguidu no husu atu testemuña ba lalais iha arguidu nia uma tanba lezada mate ona. Bainhira testemuña to'o iha arguidu nia uma, testemuña haree arguidu ko'us hela lezada iha kama leten no arguidu hateten ba testemuña katak lezada mate tanba moras bibi maten. Depoide ida-ne'e, arguidu haruka testemuña ba bolu arguidu nia subriña (FdG) atu fó haris lezada nia mate isin. Depoide testemuña ba bolu tiha FdG, testemuña fila fali ba nia uma no iha dadersan, testemuña rona katak polísia ka'er ona arguidu tanba deskonfia arguidu mak oho lezada.

Testemuña BV ho idade tinan 8 nu'udar arguidu ho lezada nia oan sarani depoimenta iha loron ne'e arguidu ho lezada ba bolu testemuña iha nia uma hodi ba halimar no toba ho arguidu no lezada tanba sira foin mai hosi Dili. Iha kalan bo'ot testemuña hakfodak no hadeer tanba rona lezada tanis. Testemuña haree lezada tanis no uza telefone baku dala barak ba iha arguidu nia isin-loloon. Hafoin arguidu no lezada dudu malu to'o lezada monu tuun ba rai. Lezada hamrik husi rai no tanis maka'as. Arguidu rasta lezada nia liman sai ba sala liur. Testemuña ta'uk no uza lensol taka metin nia ulun no toba fila fali. Iha dadersan, testemuña hadeer no haree ema barak iha uma no balun hateten ba nia katak lezada mate ona.

Alegasaun final

Prokuradór konsidera arguidu provadu komete krime omisídiu agravadu ho natureza violénsia doméstika tanba prátika krime hasoru nia feen ho maneira uza liman loos buti kakorok to'o lezada iis kotu. Faktu hirak ne'e bazeia ba arguidu nia deklarasaun no konfirma ho depoimentu husi testemuña FdG, IT no BV inklui relatóriu médiku nian. Tanba ne'e, husu ba tribunál atu kondena arguidu ho pena prizaun tinan 15.

Enkuantu parte defeza husu ba tribunál atu tetu sirkunstánsia atenuante sira hanesan arguidu laiha intensaun atu halo-mate lezada no arguidu konfesa integralmente ba faktu sira iha akuzasaun prokuradór nian. Tanba ne'e, husu atu kondena arguidu ho pena ne'ebé justu.

Desizaun

Depoisde avalia faktu sira hotu, tribunál prova katak arguidu oho lezada liuhusi uza liman loos buti lezada nia kakorok no liman karuk hanehan lezada nia reen-toos kuaze minutu hitu nia laran, to'o rezulta lezada iis kotu (mate). Bazeia ba prova sira ne'e, tribunál konklui prosesu ne'e no kondena arguidu ho pena prizaun tinan 18 prizaun.

2. Krime aktu seksuál ho adolexente

Nu. Prosesu : 0027/16.PDSUA
Kompozisaun Tribunál : Koletivu
Juis : Dr. Samuel Pacheco, Dra. Florençia Gusmão no Dr. Naason Sarmiento
Prokuradór : Dr. Jose Elo
Defeza : Dr. Manuel Amaral
Desizaun : Absolve

Iha 08 Abril 2019, Tribunál Distritál Suai prezide julgamentu leitura sentensa ba krime aktu seksuál ho adolexente ne'ebé envolve arguidu MG hasoru MB nu'udar arguidu nia subriña ho idade tinan 14, iha Distritu Covalima.

Akuzasaun Prokuradór

Prokuradór akuza katak iha loron ne'ebé la apura maibé iha Marsu 2016, arguidu ne'ebé ho kondisaun defisénsia matan no nu'udar lezada nia aman ki'ik ba iha lezada nia uma no husu ba lezada nia aman atu lezada ba toba iha arguidu nia uma tanba arguidu nia feen tun tiha mai Dili.

Lezada nia aman aseita no lezada ba toba duni iha arguidu nia uma. Iha kalan bo'ot bainhira lezada toba dukur, arguidu tama ba iha lezada nia kuartu-laran no fanu lezada. Arguidu see nia ai-tonka ba lezada nia kakorok no ameasa sei baku mate lezada bainhira lezada hakilar. Hafa'in ne'e, arguidu kolu lezada nia roupa no kolu mós nia roupa rasik no halo relasaun seksuál ho lezada. Arguidu repete nia hahalok ne'e iha kalan tuir mai.

Prokuradór mós akuza katak iha loron ne'ebé la apura maibé iha Setembru 2016, arguidu ba iha lezada nia uma no obriga lezada halo relasaun seksuál iha dapur laran. Arguidu nia hahalok ne'e rezulta lezada isin rua no iha 2017 lezada partu bebe mane ida.

Prokuradór akuza arguidu kontra artigu 172 KP kona-ba violasaun seksuál no artigu 173 (d) KP kona-ba ho agravasaun tanba lezada seidauk atinje tinan 17.

Produsaun ba prova sira

Iha julgamentu, arguidu konfesa faktu sira maibé deklarata katak relasaun seksuál ne'e akontese ho konsentimentu husi lezada. Arguidu hatutan katak iha kalan ne'e, arguidu tama ba iha lezada nia kuartu-laran no hateten ba lezada katak nia hakarak halo relasaun seksuál ho lezada no lezada mós hakarak. Lezada rasik kolu nia rounpa no sira halo relasaun seksuál. Arguidu deklarata katak sira repete relasaun seksuál ne'e iha kalan rua tuir mai no mós iha Setembru 2016 bainhira arguidu ba husu aidila-tahan iha lezada nia uma no haree lezada iha dapur-laran, nune'e sira halo tan relasaun seksuál.

Enkuantu lezada kontinua konfirma faktu sira iha akuzasaun no deklarata katak akontesimentu iha Marsu 2016, arguidu la ameasa atu oho lezada maibé dehan sei baku lezada. Lezada mós deklarata katak depoisde akontesimentu, iha dadersan lezada sei ba lezada nia uma no iha lokraik fila fali ba toba iha arguidu nia uma. Lezada dehan katak maske nia ta'uk maibé nia nafatin ba toba iha arguidu nia uma no iha kalan arguidu halo tan relasaun seksuál ho lezada maibé la ho ameasa ona. Aleinde ne'e, lezada konfirma kona-ba relasaun seksuál ne'ebé akontese iha Setembru 2016. Iha ikus, lezada nia família sira hatene bainhira lezada isin rua.

Kona-ba kondisaun arguidu nu'udar defisiénsia matan, lezada deklarata katak maske arguidu la haree, maibé arguidu sempre ba mai lezada nia uma no viziñu sira ho ai-tonka no nunca monu. Arguidu iha feen no oan na'in tolu.

Alegasaun final

Prokuradór husu ba tribunál atu halo alterasaun ba kualifikasaun jurídiku hosi krime violasaun seksuál ho agravasaun ba fali krime aktu seksuál ho adolexente ne'ebé previstu iha artigu 178 KP ho konsiderasaun katak iha momentu akontesimentu, lezada nia idade tinan 14 ona no la prova arguidu ameasa lezada. Konsiderasaun ne'e, bazeia ba lezada nia deklarasaun katak lezada la'o ba mai ho livre no ho konsentimentu halo tan relasaun seksuál iha loron tuir mai. Maibé tanba lezada isin rua ona, husu ba tribunál atu kondena arguidu ho pena prizaun tuir moldura penál ne'ebé previstu iha krime ida ne'e.

Enkuantu defeza laiha opozisaun ba prokuradór nia konsiderasaun no husu pena ne'ebé kmaan tanba arguidu konfesa ninia hahalok katak nia halo duni relasaun seksuál maibé ho lezada nia konsentimentu ka la ho ameasa. Aleinde ne'e, lezada foin hateten sai arguidu ninia hahalok ne'e bainhira lezada isin rua ona.

Desizaun

Depoisde avalia faktu sira hotu, tribunál halo alterasaun ba kualifikasaun jurídiku husi krime violasaun seksuál ho agravasaun ba fali aktu seksuál ho adolexente tanba lezada nia idade tinan 14 ona. Tribunál la prova faktu sira iha akuzasaun tanba arguidu la ameasa bainhira halo relasaun seksuál ho lezada. Tribunál konsidera katak lezada ho konsentimentu halo relasaun

seksuál ho arguidu hamutuk dala tolu to'ó isin rua. Bazeia ba faktu la provadu no konsiderasaun sira, tribunál absolve arguidu husi akuzasaun prokuradór.

3. Krime ofensa ba integridade fízika simples ho natureza violénsia doméstika

Nú. Prosesu : 0007/16.BBATB
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Jose Elo
Defeza : Dr. Manuel Amaral
Desizaun : Pena prizaun fulan 6 suspende ba tinan 1 no pena prizaun fulan 3 suspende ba fulan 6

Iha 08 Abril 2019, Tribunál Distrital Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VMR no arguida LRT hasoru lezada nu'udar arguidu VMR nia feen no arguida LRT nia inan madrasta, iha Distritu Bobonaro.

Akuzasaun Prokuradór

Prokuradór akuza katak iha loron la apuradu maibé iha fulan-Abril 2017 meiodia, arguidu VMR nu'udar profesor fila husi eskola ba uma. Bainhira to'ó iha uma, lezada hateten ba arguidu katak nia osan US\$24.00 lakon iha armáriu laran. Depoizde rona tiha informasaun ne'e, arguidu VMR basa lezada nia ulun dala lima no rezulta lezada nia ulun moras. Liutiha akontesimentu ne'e, iha lokraik, lezada husu tuir osan US\$24.00 refere ba arguida LRT, nune'e, sira diskute malu no arguida LRT rakut lezada nia fuuk no dada tuun ba rai no rezulta lezada sofre moras iha ulun.

Aleinde ne'e, prokuradór mós akuza katak iha 14 Outubru 2016, arguidu no lezada nia osan US\$500.00 lakon iha armáriu laran. Arguidu no lezada diskute malu kona-ba osan lakon ne'e no arguidu duun lezada fó osan ne'e ba mane seluk nune'e, arguidu tuku no tebe dala barak iha lezada nia isin-loloon.

Prokuradór akuza arguidu ho arguida kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu katak nia baku duni dala lima iha lezada nia ulun maibé rejita faktu sira ne'ebé akontese iha 14 Outubru 2016 katak tuku ho tebe dala barak ba lezada nia isin-loloon. Arguidu deklara katak nia laiha koñesimentu kona-ba arguida LRT baku lezada.

Arguida LRT konfesa katak nia rakut duni lezada nia ulun tanba lezada duun arguida mak foti lezada nia osan. Arguida LRT deklara katak nia laiha koñesimentu kona-ba agresaun ne'ebé arguidu VMR halo hasoru lezada iha Abril 2017 no 14 Outubru 2016.

Enkuantu, lezada kontinua konfirma faktu katak arguidu baku duni lezada nia ulun dala lima no konfirma mós katak arguida LRT rakut duni nia fuuk. Maibé faktu kona-ba arguidu tuku no tebe dala barak, lezada rejenta no deklara katak lezada mak inventa istoria. Mezmu nune'e, agora dadaun sira di'ak malu ona no to'o agora arguidu VMR no arguida LRT nunka halo tan agresaun hasoru lezada.

Alegasaun final

Prokuradór konsidera faktu sira provadu hotu katak arguidu no arguida halo duni agresaun hasoru lezada. Maske lezada nega ba faktu balun maibé prokuradór nota hosi lezada nia espresaun hatudu momoos katak lezada nia deklarasaun ne'e hanesan atu salva de'it arguidu. Tanba ne'e, atu halo prevensaun iha futuru, husu ba tribunál atu kondena arguidu VMR ho pena prizaun tinan rua suspende ba tinan haat no kondena arguida LRT ho pena prizaun fulan neen suspende ba tinan ida.

Enkuantu defeza husu ba tribunál atu konsidera arguidu no arguida sira nia sentidu arrendimentu, liuhusi arguida konfesa ninia hahalok, maske arguidu VMR nega faktu balun maibé sira di'ak malu ona ho lezada. Tanba ne'e, husu ba tribunál atu kondena arguidu no arguida ho pena ne'ebé justu.

Desizaun

Hafoin avalia prova sira ne'ebé prodús iha julgamentu, tribunál prova katak arguidu VMR baku dala lima ba lezada nia ulun no tuku ho tebe dala barak iha lezada nia isin-lolon. Enkuantu, tribunál prova arguida LRT rakut lezada nia fuuk.

Bazeia ba prova sira ne'e, tribunál konklui prosesu ne'e no kondena arguidu VMR ho pena prizaun fulan neen suspende ba tinan ida. Enkuantu arguida LRT, tribunál kondena ho pena prizaun fulan tolu suspende ba fulan neen.

4. Krime abuzu seksuál ba menór ho agravasaun*

Nú. Prosesu : 0001/17.MFSIC
Kompozisaun Tribunál : Koletivu
Juis : Dr. Naason Mario Armindo Marques Doutel, Dr. Samuel da Costa Pacheco no Dra. Florencia Freitas

* Kazu ne'e tribunál halo rejulgamentu tanba prova lakon nia efikasias. Aleinde ne'e, JSMP la monitoriza alegasaun final ba kazu ne'e.

Prokuradór : Dr. José Elo
Defeza : Dr. Gaspar Ferreira Gusmão (advogadu privadu)
Desizaun : Pena prizaun tinan 8

Iha 23 Abril 2019, Tribunál Distritál Suai prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu LCR, PdJ, MdS ho VM hasoru lezada ne'ebé ho idade menoridade (12 fulan 9), iha Distritu Same.

Akuzasaun Prokuradór

Prokuradór akuza katak iha 06 Feveireiru 2017, oras tuku 19:30 kalan, lezada fila husi sosa pensu (*softtek*) iha kioske ne'ebé besik ho ninia hela fatin. Bainhira lezada la' o liu husi arguidu sira ne'ebé tuur hela iha dalan ninin. Hafoin arguidu LCR kaer lezada nia liman no hakoak lezada. Arguidu VM taka hena mean ida ba iha lezada nia ibun no arguidu LCR no VM bolu tan arguidu PdJ no MdS no sira hamutuk rasta lisuk lezada ba uma mamuk ne'ebé besik iha fatin akontesimentu.

Iha uma mamuk ne'e, arguidu LCR dudu lezada ba parede no halo relasaun seksuál ho lezada dala rua. Enkuantu arguidu na'in tolu seluk hein iha liur. Depoisde halo tiha relasaun seksuál ho lezada, arguidu LCR sai ba liur no arguidu na'in tolu seluk tama hamutuk ba iha uma mamuk ne'e no troka malu halo relasaun seksuál ho lezada.

Lezada nia inan ne'ebé foin fila husi serbisu fatin, la haree lezada iha uma, nune'e buka tuir lezada no haree lezada no arguidu sira foin sai husi duut laran ne'ebé besik uma mamuk ne'e ho lezada nia kondisaun roupa isin lolon sabraut, fuuk sabraut no isin fraku loos. Haree lezada ninia kondisaun hanesan ne'e, lezada nia inan husu ba lezada saida mak akontese ba lezada. Lezada esplika ba ninia inan katak arguidu sira obriga halo relasaun seksuál ho nia. Bainhira rona lezada koalia hanesan ne'e, testemuña ho lezada ba kedas iha arguidu LCR ninia uma hodi husu tuir saida mak sira halo ona ba lezada, maibé arguidu nega. Tanba ne'e lezada ho nia inan ba hato'o kedas keixa iha polísia. Iha kazu ne'e anexa mós ho relatóriu médiku husi ospital.

Prokuradór akuza arguidu sira kontra artigu 177 alinea (1) KP kona-ba krime abuzu seksuál ba menór ho moldura penál tinan 5 to'o tinan 15 prizaun.

Produsaun ba prova sira

Iha julgamentu, arguidu LCR rekoñese katak nia bolu duni lezada no hamutuk ho lezada tama ba uma aat ne'e no iha ne'ebá arguidu halo relasaun seksuál ho lezada. Arguidu PdJ deklara katak nia halo relasaun seksuál ho lezada depoisde arguidu LCR halo relasaun seksuál ho lezada.

Nune'e mós arguidu MdS deklara katak nia halo relasaun seksuál depoisde arguidu PdJ remata halo relasaun seksuál ho lezada. Arguidu VM deklara katak bainhira nia tama ba uma laran, haree katak lezada ho kondisaun kalsa dada tuun to'o ain ona sein hasai faru, nune'e arguidu ba

halo relasaun seksuál ho lezada. Arguidu sira deklara katak sira halo relasaun seksuál ho lezada dala ida no la obriga lezada.

Enkuantu lezada deklara katak arguidu sira halo duni relasaun seksuál tuir faktu sira iha akuzasaun maibé la obriga, la rasta no la riba lezada ba parede.

Desizaun

Depoide avalia faktu sira hotu, tribunál prova katak iha 06 Feveireiru 2017, oras tuku 19:30 kalan, lezada fila husi hola pensu iha kioske no la'o liu husi arguidu sira ne'ebé tuur hela iha dalan ninin. Arguidu sira bolu lezada no haruka lezada ba iha uma mamuk ida no lezada mós ba iha uma mamuk ne'e. Arguidu sira tuir lezada no iha uma mamuk ne'e, arguidu sira ida-idak tama no halo relasaun seksuál ho lezada. Tribunál prova katak lezada nia inan buka lezada no haree lezada no arguidu sira foin sai husi duut laran besik iha uma mamuk refere ho lezada nia kondisaun rounpa no fuuk sabraut, no isin fraku. Faktu hirak ne'e provadu bazeia ba rezultadu médiku ne'ebé deskreve katak lezada sofre kanek iha nia orgaun seksuál tanba sinál husi relasaun seksuál.

Entretantu tribunál la prova arguidu LCR hakuak lezada, la prova arguidu VM taka hena mean iha lezada niaibun no la prova arguidu LCR no VM bolu arguidu na'in rua seluk. Tribunál la prova arguidu sira rasta lisuk lezada ba uma mamuk, la prova arguidu LCR dudu lezada ba parede, la prova arguidu LCR halo relasaun dala rua ho lezada. Aleinde ne'e, tribunál la prova arguidu sira tama hamutuk no halo relasaun seksuál troka malu ho lezada.

Bazeia ba faktu provadu no la provadu sira ne'e no sirkunstánsia sira relasiona ho kazu ne'e, tribunál konklui prosesu ne'e no kondena arguidu LCR, PdJ, MdS no VM ho pena prizaun tinan 8 (ualu) ba kada arguidu. Tribunál mós halo alterasaun ba medida koasaun hosi apresentasaun periodikamente ba fali prizaun preventiva hodi hein desizaun tranzitu iha julgadu. Defeza apresenta rekursu tanba la konkorda ho desizaun tinan ualu ne'e. Entretantu relasiona rekursu ne'e iha fulan-Jullu 2019, Tribunál Rekursu deside mantein arguidu sira ho pena prizaun tinan ualu ba kada arguidu.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

Diresaun e-mail: santos.cas76@gmail.com

Website: <http://jsmp.tl>

Telefone:3323883